



Lámhleabhar 2025-2026

An M.Oid. san Oideachas
Lán-Ghaeilge & Gaeltachta
Bliain 1

Scoil an Oideachais
Coláiste na Tríonóide





Nóta

Clár

Nóta	2
1. Fáilte	4
1.1 Fáilte ón gCeann Scoile.....	4
1.2 Fáilte ó Oifig an M.Oid.	5
1.3 An Lámhleabhar Seo.....	5
1.4 Scoil an Oideachais	5
2. Eolas Ginearálta agus Sonraí Teagmhála	6
2.1 Oifig an M.Oid.....	6
2.2 Sonraí Teagmhála na Foirne	6
2.3 Teagmhálaithe Úsáideacha Eile	7
3. Eolas faoin M.Oid.....	8
3.1 Achoimre ar an gCúrsa	8
3.2 Aidhmeanna an Chúrsa	8
3.3 Na Modúil	9
3.4 Creidiúintí Acadúla	11
3.5 Tinreamh agus Asláithreachtaí	12
3.6 Ranganna Teagaisc agus Tacaíocht Teanga	12
3.7 Scoil Fómhair	13
3.8 Sceideal An Chúrsa	13
3.9 Aiseolas ar an gCúrsa.....	13
3.10 Ionadaí Ranga	13
3.11 Bliain 2 agus An Tráchtas	13
3.12 Blackboard Ultra	13
4. Measúnú ar an bhFoghlaim.....	14
4.1 Rialacháin Mheasúnaithe	14
4.2 Modhanna Measúnaithe	16
4.3 Critéir Mheasúnaithe.....	17
4.4 Obair Chúrsa a Chur Isteach	17
4.5 An Scríbhneoireacht Acadúil	18
4.6 Ionracas Acadúil, Bradaíl agus Polasaí Maidir le hÚsáid na Teicneolaíochta.....	18
4.7 Athsheiceáil agus Achomhairc.....	21



4.8 Sceideal Measúnaithe na Bliana	22
4.9 Acmhainní Úsáideacha	22
5. Seirbhísí agus Saol an Choláiste.....	26
5.1 An Leabharlann.....	26
5.2 Seirbhísí Míchumais na Tríonóide	26
5.3 An tSeirbhís Chomhairleach Iarchéime (Postgraduate Advisory Service)	26
5.4 Seirbhísí Tacaíochta	27
5.5 Seirbhísí Tacaíochta Foghlama.....	27
5.6 Seomra na Gaeilge.....	28
5.7 An Cumann Gaelach	28
5.8 Searmanais Bhronnta	29
5.9 Seomra Léitheoireachta Iarchéime 1937.....	29



1. Fáilte

1.1 Fáilte ón gCeann Scoile

Fáilte romhat go Coláiste na Tríonóide, Ollscoil Átha Cliath, don bhliain atá romhainn. Tá súil agam go mbainfidh tú taitneamh as do chuid ama linn is go n-éireoidh leat le do chúrsa i mbliana.

Le breis agus 400 bliain anuas tá áit lárnach ag Coláiste na Tríonóide i saol acadúil, cultúrtha agus sóisialta shochaí na hÉireann agus is ollscoil í a bhfuil aitheantas agus tionchar ollmhór domhanda aici. Mar chuid den traidisiún sin, gabhann Scoil an Oideachais buíochas leat as páirt a ghlacadh inár bpobal agus tá súil againn go mbeidh d'aistear oideachasúil níos saibhre dá bharr.

Tá Scoil an Oideachais ar cheann de na scoileanna gairmiúla is mó i gColáiste na Tríonóide, agus tá sí tiomanta d'oideachas tosaigh múinteoirí, oideachas iarchéime agus d'fhorbairt ghairmiúil leanúnach. Tá an Scoil tiomanta do thaighde ar ardchaighdeán a dhéanamh atá nasctha go dlúth leis an teagasc ag leibhéil fochéime agus iarchéime araon. Tá aitheantas náisiúnta agus idirnáisiúnta bainte amach ag an Scoil i bpobail acadúla agus ghairmiúla araon, agus cuireann taighde na Scoile lenár tuiscint ar an oideachas agus ar an gcleachtas; rangáodh an Scoil in áit 75 ar domhan sa *QS World University Subject Rankings* i mbliana. Is léiriú é fás leanúnach na Scoile ar an gcúram agus ar an aird a thugann muid do na mic léinn go léir, idir nua agus bhunaithe.

Tá neart eolais sa Lámhleabhar seo a chabhróidh leat agus tú ag obair i dtreo na Máistreachta. Guím gach rath ort sa bhliain atá romhainn agus táim ag tnúth le bualadh leat le linn do chuid ama i Scoil an Oideachais.

An tOllamh Ann Devitt
Ceann Scoile



1.2 Fáilte ó Oifig an M.Oid.

Fáilte go dtí an M.Oid. san Oideachas Lán-Ghaeilge agus Gaeltachta i Scoil an Oideachais. Táimid muiníneach go mbainfidh tú tairbhe agus fiúntas as an M.Oid. agus as an tréimhse a chaithfidh tú i Scoil an Oideachais. Tugann an cúrsa an deis do rannpháirtithe ardchaighdeán feabhais a bhaint amach ina gcleachtais oideachais agus ina n-inniúlacht teanga. Tá an clár deartha dóibh siúd atá ag obair go lánaimseartha. Cuirfear tuilleadh eolais ar fáil le linn na bliana ag an nasc thíos:

Suíomh Gréasáin: <https://www.tcd.ie/education/courses/postgraduate/m-oid-san-oideachas-lan-ghaeilge-agus-gaeltachta/>

Molaimid do gach mac léinn M.Oid. an Lámhleabhar a léamh go críochnúil. Guímid gach rath ort sa bhliain amach romhainn.

1.3 An Lámhleabhar Seo

Dearadh an Lámhleabhar seo do mhic léinn an M.Oid. i gColáiste na Tríonóide, Ollscoil Átha Cliath agus cuireann sé leis an eolas atá ar fáil i bhFéilire Choláiste na Tríonóide 2025/2026 (féach: <https://www.tcd.ie/calendar/>). Tá an Lámhleabhar mar threoir do ghnéithe éagsúla den chlár M.Oid a chuirtear ar fáil i Scoil an Oideachais.

D'fhéadfadh sé go dtiocfaidh athrú ar an gclár tar éis an Lámhleabhar seo a fhoilsiú. Cuirfear aon leasuithe riachtanacha in iúl duit trí do sheoladh ríomhphoist don choláiste. I gcás aon choimhlint idir Rialacháin Ghinearálta an Choláiste, ar fáil i Féilire Choláiste na Tríonóide, agus an Lámhleabhar seo, beidh forlámhas ag forálacha na Rialachán Ginearálta (féach: <https://www.tcd.ie/calendar/>). Tá cóip den Lámhleabhar seo ar fáil ar shuíomh gréasáin Scoil an Oideachais.

1.4 Scoil an Oideachais

Bunaíodh Scoil an Oideachais i 1905 agus tá sí ar cheann de scoileanna gairmiúla móra na hOllscoile. Le 100 bliain anuas, d'fhás sí ó thaobh méide agus cáile de agus cuirtear réimse suntasach cúrsaí iarchéime ar fáil i Scoil an Oideachais, agus déantar taighde ar go leor réimsí tábhachtacha oideachais chomh maith.

2. Eolas Ginearálta agus Sonraí Teagmhála

2.1 Oifig an M.Oid.

Más mian leat cuairt a thabhairt ar oifig an M.Oid. go pearsanta, ní mór duit ríomhphost a chur chuig an oifig M.Oid. roimh ré chun cuairt a eagrú. Féach na sonraí thíos chun teagmháil a dhéanamh:

- Ríomhphost: moid@tcd.ie

2.2 Sonraí Teagmhála na Foirne

Déanfaidh Scoil an Oideachais cumarsáid leat trí do sheoladh ríomhphoist ollscoile a gheobhaidh tú nuair a chláróidh tú. Moltar duit do chuntas ríomhphoist a sheiceáil go rialta. Tabhair faoi deara, ar an gcéad dul síos, gur chóir gach fiosrúchán maidir le modúil, measúnuithe, aiseolas agus feitheoireacht taighde a sheoladh chuig Oifig an M.Oid. ag moid@tcd.ie.

Ball foirne	Sonraí
Ann Devitt Ceann Scoile	Ríomhphost: headofeducation@tcd.ie
Conn McCluskey Bainisteoir Scoile	Ríomhphost: cmclusk@tcd.ie
Emily Barnes Comhordaitheoir an Chúrsa (ó Eanáir 2026)	Ríomhphost: barnesem@tcd.ie
Iseult Ní Chonchúir Comhordaitheoir Teanga	Ríomhphost: nchonchi@tcd.ie
Gavin Murphy Comhordaitheoir Modúil	Ríomhphost: gavin.murphy@tcd.ie
Breandán Mac Gearailt Comhordaitheoir Bhliain 1	Ríomhphost: bmacgear@tcd.ie
Noel Ó Murchadha Comhordaitheoir an Chúrsa (go hEanáir 2026)	Ríomhphost: noel.omurchadha@tcd.ie
Keith Johnston Stiúrthóir um Theagasc agus Fhoghlaim Iarchéime	Ríomhphost: kjohnsto@tcd.ie
Caoimhe Ní Bhraonáin Oifigeach Sinsearach Feidhmiúcháin	Ríomhphost: moid@tcd.ie
TJ Ó Ceallaigh Scrúdaitheoir Seachtrach	Ollamh Comhlach, Scoil an Oideachais, Coláiste na hOllscoile, Corcaigh

2.3 Teagmhálaithe Úsáideacha Eile

Tacaíocht Teicneolaíochta (*IT Services*)

Cuirtear tacaíocht teicneolaíochta ar fáil do mhic léinn trí Dheasc Seirbhíse IT an Choláiste. Tá réimse leathan oiliúna IT ar fáil freisin — ar líne nó ar an láthair.

- Seoladh: Áras an Phiarsaigh, Coláiste na Tríonóide, Baile Átha Cliath 2.
- Uaireanta Oscailte: Luan go hAoine: 9am—5pm.
- Uimhir theileafóin: + 353-1-896 2000.
- Ríomhphost: itservicedesk@tcd.ie
- Suíomh Gréasáin: <https://www.tcd.ie/itservices/>

Tá treoir maidir le rochtain a fháil ar chóras wifi an choláiste ar fáil anseo:

<https://www.tcd.ie/itservices/our-services/student-wi-fi/>

An Chlárlann Acadúil

Bíonn go leor seirbhísí éagsúla – ó chúrsaí clárúcháin go bronnadh na céime – faoi chúram na Clárlainne Acadúla

- Seoladh: Áras Watts, Coláiste na Tríonóide, Baile Átha Cliath 2.
- Uaireanta Oscailte: Luan go hAoine: 9am—5pm.
- Uimhir theileafóin: + 353-1-8964500.
- Ríomhphost: academic.registry@tcd.ie
- Suíomh Gréasáin: <https://www.tcd.ie/academicregistry/>

3. Eolas faoin M.Oid.

3.1 Achoimre ar an gCúrsa

Cuireadh tús leis an M.Oid. san Oideachas Lán-Ghaeilge agus Gaeltachta i gColáiste na Tríonóide sa bhliain acadúil 2023-24. Is do mhúinteoirí agus do cheannairí i suímh scoile lán-Ghaeilge agus Gaeltachta an cúrsa seo, bídís ina múinteoirí nó ina gceannairí bunscoile nó iar-bhunscoile. Tugann an cúrsa an deis do rannpháirtithe ardchaighdeán feabhais a bhaint amach ina gcleachtais oideachais agus ina n-inniúlacht teanga.

Dearadh an sceideal teagaisc agus foghlama le go mbeadh rannpháirtithe atá ag obair go lán-aimseartha in ann tabhairt faoin gcúrsa agus freastal ar na léachtaí agus ar na ranganna teagaisc ar fad. Chuige sin, tá dearadh an chúrsa bunaithe ar an bhfoghlaim chumaisc agus beidh idir léachtaí ar líne (c. 40%) agus léachtaí ar an láthair (c. 60%) i gceist. Cuireann rannpháirtithe sé mhodúl múinte i gcrích i mBliain 1 (is ionann gach modúl agus 10 ECTS). I mBliain 2, cuireann siad modúl múinte amháin (10 ECTS) i gcrích chomh maith le modúl an tráchtas (30 ECTS).

3.2 Aidhmeanna an Chúrsa

Cuirtear béim san M.Oid. ar fhorbairt an chleachtais, agus ar fhorbairt scileanna taighde a bheidh ina mbonn fianaise don chleachtas. Baintear é sin amach trí dheiseanna a chur ar fáil le haghaidh machnamh criticiúil, rannpháirtíocht ghníomhach i gcúrsaí, agus trí inniúlachtaí teoiriciúla, fealsúnachta agus curaclaim a fhorbairt.

Tar éis do mhic léinn an cúrsa a chríochnú go rathúil, ba cheart go mbeadh siad in ann:

1. Anailís chriticiúil a dhéanamh ar riachtanais foghlaimeoirí dátheangacha/ilteangacha agus ar an gcaoi ar féidir freastal orthu san oideachas trí mheán teanga mionlaí;
2. Meastóireacht a dhéanamh ar pholasaí agus ar chleachtas san oideachas lán-Ghaeilge agus Gaeltachta;
3. Ábhair, beartais agus cleachtais atá oiriúnach don chomhthéacs a fhorbairt chun teagasc agus foghlaim éifeachtach agus ionchuimsitheach a éascú ina suímh oideachais;
4. Feasacht ar a n-inniúlacht sa Ghaeilge a chur in iúl agus pleanáil lena forbairt go Leibhéal C1 ar an CEFR;

5. Measúnú a dhéanamh ar mhúnlaí pleanála, measúnaithe agus ceannaireachta agus meastóireacht a dhéanamh ar a oiriúnaí atá siad i suímh lán-Ghaeilge agus Gaeltachta;
6. Ceannaireacht a léiriú maidir le beartas agus cleachtas éifeachtach agus cuimsitheach a dhearadh agus a chur chun feidhme ina suímh oideachais;
7. Cleachtais ar leibhéal an tseomra ranga agus ar leibhéal na scoile a dhearadh atá bunaithe ar thaighde, dírithe ar thaighde, comhtháite le taighde agus taighde-threoraithe;
8. Imscrúdú a dhéanamh ar ról an mhúinteora mar thaighdeoir agus ar a gcumas athruithe a chur i bhfeidhm i suímh lán-Ghaeilge agus Gaeltachta;
9. Anailís chriticiúil a dhéanamh ar shaincheisteanna comhaimseartha ina réimse taighde agus tionscadal taighde féinstiúrtha a dhearadh agus a dhéanamh atá ábhartha dá gcleachtas;
10. Saineolas ar chineálacha eimpíreacha/neamheimpíreacha taighde a léiriú agus machnamh criticiúil a dhéanamh ar impleachtaí sóisialta, gairmiúla agus eiticiúla a gcuid taighde;
11. Réasúnaíocht taighde, creatlach taighde agus conclúidí taighde a chur in iúl go héifeachtach do lucht féachana speisialaithe agus neamhspeisialaithe ina réimse féin;
12. Inniúlacht shaineolach sa Ghaeilge a léiriú de réir Leibhéal C1 ar an CEFR.

3.3 Na Modúil

Tá cur síos ar na modúil ar fáil thíos:

Modúl	Cur síos
BLIAIN 1	
Modúl 1: An tumoideachas agus an dátheangachas (10 ECTS):	Sa mhodúl seo, díreoidh na rannpháirtithe ar shaintréithe an tumoideachais agus an dátheangachais ar shlí a chuirfidh ar a gcumas dul i mbun cleachtas ionchuimsitheach taighde-bhunaithe. Cíorfaidh na rannpháirtithe múnlaí tumoideachais agus múnlaí oideachais dátheangacha agus déanfaidh siad anailís ar an sealbhú teanga agus litearthachta sna comhthéacsanna sin.

Modúl 2: An dea-chleachtas i suímh Ghaeltachta agus lán-Ghaeilge (10 ECTS):	Díríonn an modúl seo ar mhúnlaí rialála agus polasaí an dea-chleachtais, ar an dea-chleachtas i gcur chun cinn na litearthachta do chách agus ar fhorbairt pobail foghlama Ghaeilge-bhunaithe. Cuirfear béim faoi leith ar an tslí a dtuigtear agus a gcuirtear na cleachtais sin ar fad i bhfeidhm i gcomhthéacsanna scoile Gaeltachta agus lán-Ghaeilge.
Modúl 3: An teagasc agus an fhoghlaím i suímh scoile lán-Ghaeilge agus Gaeltachta (10 ECTS):	Cuirtear béim sa mhodúl seo ar chuir chuige theoiriciúla agus oideolaíocha don sealbhú teanga agus d'fhorbairt na litearthachta i gcomhthéacsanna tumoideachais. Tá an gaol idir teangacha difriúla agus idir scileanna teanga difriúla lárnach sa mhodúl. Déantar iniúchadh sa ghné oideolaíoch den mhodúl ar chuir chuige foghlama agus teagaisc a chuireann leis an bhforbairt teanga.
Modúl 4: An cleachtas pleanála agus measúnaithe (10 ECTS):	Sa mhodúl seo, déanfaidh na rannpháirtithe anailís ar an tslí le measúnú a úsáid don phleanáil agus chun feabhas a chur ar an teagasc agus ar an bhfoghlaím ag leibhéal ranga agus scoile. Cuirfear béim ar thimpeallacht ionchuimsitheach foghlama a chruthú, ar chur chun cinn na Gaeilge don ghnáthchumarsáid, agus ar fhorbairt scileanna teanga, litearthachta agus uimhearthachta ar bhonn inmharthana.
Modúl 5: An cheannasaíocht agus an bhainistíocht (10 ECTS):	Déanfaidh na rannpháirtithe iniúchadh ar an gceannasaíocht agus ar an mbainistíocht scoile éifeachtach sa mhodúl seo, le béim faoi leith ar an ionchuimsitheacht agus ar an gcothromas, agus conas iad sin ar fad a chur i bhfeidhm i scoileanna lán-Ghaeilge agus Gaeltachta. Cuirfear léargas ar fáil ar bheartais náisiúnta agus a ról i bhfeabhsúchán scoile agus san fhéinmheastóireacht scoile.
Modúl 6: Múinteoirí lán-Ghaeilge agus Gaeltachta mar thaighdeoirí (10 ECTS):	Bíodh is go gcuirtear béim ar an taighde sna modúil ar fad, is sainmhodúl taighde atá sa mhodúl seo. Cuirfear léargas criticiúil ar fáil ar mhodheolaíochtaí taighde, ar scoláireacht an teagaisc agus na foghlama agus ar an litearthacht acadúil sa Ghaeilge. Tá nasc ag an modúl seo leis an tráchtas a dhéanfar i mbliain a dó agus téann na rannpháirtithe i ngleic leis an eolas agus leis na scileanna a bheidh uathu agus iad ag tabhairt faoin tráchtas.

BLIAIN 2

Modúl 7: Inniúlacht teanga sa Ghaeilge (10 ECTS):	Dírítear sa mhodúl seo ar fhorbairt inniúlacht teanga rannpháirtithe go dtí leibhéal C1 ar an bhFráma Tagartha Comónta Eorpach (.i. an CEFR). Is ionann pas sa mhodúl seo agus fianaise go bhfuil inniúlacht teanga ag leibhéal C1 ar an CEFR ag an rannpháirtí sna scileanna teanga ar fad sa Ghaeilge. Síos tríd an modúl, cuirfear béim ar an gcruinneas agus ar an bhfeasacht teanga.
Modúl 8: An tráchtas (30 ECTS):	Tógann an modúl seo ar Mhodúl 6 agus tugann sé an deis do rannpháirtithe tabhairt faoi ghrinniniúchadh, i gcomhairle leis an stiúrthóir tráchtas, ar ghné éigin den oideachas lán-Ghaeilge agus/nó Gaeltachta. Rachaidh na rannpháirtithe i ngleic ar bhonn criticiúil anailíseach le ceisteanna taighde agus cruthóidh siad píosa taighde a chuireann leis an stór eolais sa réimse léinn.

3.4 Creidiúintí Acadúla

Is éard atá sa Chóras Eorpach Aistrithe Creidmheasa (ECTS) ná córas a léiríonn ualach oibre na rannpháirtithe atá riachtanach chun cuspóirí sonraithe cláir staidéir a bhaint amach. Is ionann an líon ECTS a bhaineann leis an modúl agus tomhas ar ionchur nó ualach oibre an rannpháirtí a theastaíonn don mhodúl sin, bunaithe ar líon na n-uaireanta teagmhála (e.g. léachtaí, seimineáir, ceardlanna, stiúrthóireacht taighde), líon agus fad na measúnuithe – idir mheasúnuithe scríofa agus chuir i láthair ó bhéal, ullmhúchán do na ranganna agus am staidéir, agus scrúduithe. Níl nasc díreach ann idir líon creidiúintí an mhodúil agus a leibhéal deacrachta.

Cuireann rannpháirtithe sé mhodúl múinte i gcrích i mBliain 1 (is ionann gach modúl agus 10 ECTS). I mBliain 2, cuireann siad modúl múinte amháin (10 ECTS) i gcrích chomh maith leis an tráchtas (30 ECTS). Tá 100 ECTS le baint amach ag rannpháirtithe leis an M.Oid. a chur i gcrích, dáilte mar seo a leanas:

Comhpháirt	ECTS	Iarracht iomlán na rannpháirtithe (Uaireanta)
Modúl 1: An tumoideachas agus an dátheangachas	10	250
Modúl 2: An dea-chleachtas i suímh Gaeltachta agus lán-Ghaeilge	10	250
Modúl 3: An teagasc agus an fhoghlaim i suímh scoile lán-Ghaeilge agus Gaeltachta	10	250

Modúl 4: An cleachtas pleanála agus measúnaithe	10	250
Modúl 5: An cheannasaíocht agus an bhainistíocht	10	250
Modúl 6: Múinteoirí lán-Ghaeilge agus Gaeltachta mar thaighdeoirí	10	250
Modúl 7: Inniúlacht teanga sa Ghaeilge	10	250
Iomlán don Chomhpháirt Mhúinte	70	1,750
An Tráchtas	30	600
Iomlán	100	2,350

3.5 Tinreamh agus Asláithreachtaí

Ní mór do rannpháirtithe freastal ar gach modúl múinte agus páirt iomlán a ghlacadh iontu. Má fhreastalaíonn rannpháirtí ar níos lú ná 70% de mhodúl múinte, is féidir a aithint ag Cúirt Bhliantúil na Scrúdaitheoirí go raibh tinreamh “neamhshásúil” ag an rannpháirtí don mhodúl sin. Chun tabhairt faoin tráchtas, nó a bheith incháilithe chun go mbronnfaí an Diplóma larchéime, ní mór do rannpháirtí creidiúintí a chomhlíonadh don bhliain acadúil trí fhreastal ar léachtaí agus tríd an obair chúrsa riachtanach nó tascanna ainmnithe eile a chríochnú go rathúil (i.e. grád “Pas” ar a laghad a bhaint amach).

D’fhéadfadh sé go n-iarrfaí ar rannpháirtí atá as láthair ón gcúrsa de bharr breoiteachta, teastas leighis a chur faoi bhráid na hoifige M.Oid. laistigh de sheachtain amháin tar éis na hasláithreachta.

3.6 Ranganna Teagaisc agus Tacaíocht Teanga

Bíonn rang teagaisc ar siúl gach seachtain le linn an téarma ina ndírítear ar shaincheisteanna teanga. Chomh maith leis sin, díreofar ar ullmhúchán do na scrúduithe teanga C1 i Modúl 7, a bheidh ar siúl i mBliain 2. Bíonn cur chuige comhtháithe in úsáid ag gach léachtóir ar an gcúrsa, agus cuirtear béim ar fhorbairt na scileanna teanga go léir mar chuid de gach modúl ar an gcúrsa. Chomh maith leis sin, bíonn fáil ag rannpháirtithe ar chúrsa gramadaí *Gramadach gan Stró* ar líne (tabharfar tuilleadh eolais do mhic léinn air seo ag an lá ionductaithe).

Tá sé éigeantach freastal ar na ranganna teagaisc agus déanfar taifead ar an tinreamh gach seachtain.

3.7 Scoil Fómhair

Beidh an Scoil Fómhair ar siúl ón 25 Deireadh Fómhair – 31 Deireadh Fómhair 2025 agus is i gColáiste na Rinne, Co. Phort Láirge a bheidh sí ar siúl. Cuirfear lóistín agus cothabháil ar fáil (i gColáiste na Rinne) saor in aisce do na rannpháirtithe don Scoil Fómhair. Fágтар faoi rannpháirtithe é modh taistil a eagrú chuig an Scoil Fómhair.

Tá sé riachtanach freastal ar an Scoil Fómhair ina hiomláine.

3.8 Sceideal An Chúrsa

Tá fáil ar an sceideal iomlán ar shuíomh gréasáin an chúrsa.

3.9 Aiseolas ar an gCúrsa

Cuirimid an-fháilte roimh aiseolas ar an gCúrsa. Bíonn tuairimí na rannpháirtithe ina bhfoinse shaibhir aiseolais agus ligfidh siad dúinn feabhas a chur ar an gclár amach anseo. Déantar gach modúl a mheas ar fhoirm chaighdeánach ar bhealach anaithnid.

3.10 Ionadaí Ranga

Déanfar ionadaí ranga a thoghadh ag tús an chéad téarma. An ról atá ag an ionadaí ranga ná tuairimí an ghrúpa a chur in iúl d'fhoireann an Chláir agus ag cruinnithe de chuid Bhord an Chláir, ina bpléitear cúrsaí ginearálta a bhaineann leis an gcúrsa. Ní chuireann an ról seo bac ar aon bhealach ar rannpháirtí eile aon ábhar a bhaineann leis an gclár a phlé le Comhordaitheoir an Chláir.

3.11 Bliain 2 agus An Tráchtas

Cuirfear Lámhleabhar eile ar fáil i mBliain 2 ina gclúdófar an tráchtas 15,000 focal. Beidh togra taighde á scríobh ag rannpháirtithe mar chuid de Mhodúl 6, agus beidh sé sin ina bhunús don tráchtas i mBliain 2.

3.12 Blackboard Ultra

Beidh an t-ábhar ar fad a bheidh ag teastáil don mhodúl ar fáil ar Blackboard Ultra.

4. Measúnú ar an bhFoghlaim

4.1 Rialacháin Mheasúnaithe

Tá roinnt gnéithe de na rialacháin seo a leanas ceaptha don M.Oid san Oideachas Lán-Ghaeilge agus Gaeltachta, ach tagraíonn siad den chuid is mó do Chuid III d'fhéilire 2025-2026 don Léann Iarchéime agus d'Ardchéimeanna a fhoilseofar roimh thús an téarma teagaisc:

1. Beidh marc deiridh an chláir bunaithe ar mheán ualaithe de réir ECTS den mharc a bronnadh i ngach modúl;
2. Is é 50% agus os a chionn pasmharc an chúrsa seo;
3. Ní mór do mhic léinn creidiúintí a fháil do gach bliain acadúil den chúrsa páirtaimseartha seo trí gach riachtanas cúrsa a chomhlíonadh go sásúil. I mBliain 1, ní mór do mhic léinn pas a fháil i ngach modúl 10 ECTS (60 creidiúint san iomlán). I mBliain 2, ní mór do mhic léinn 40 creidiúint a ghnóthú: modúl múinte 10 ECTS agus 30 ECTS taighde;
4. Le bheith incáilithe don Mháistreacht, ní mór do rannpháirtithe, ar a laghad:
 - I. pasmharc foriomlán a bhaint amach, arb ionann é go hiondúil agus an meánmharc – ualaithe de réir creidiúintí – do na modúil múinte uilig.
 - II. pasmharc a bhaint amach i ngach modúl; agus
 - III. pasmharc a bhaint amach sa tráchtas; agus
 - IV. pasmharc a bhaint amach in Inniúlacht na Gaeilge (Modúl 7).
5. Déanann Cúirt na Scrúdaitheoirí marcanna modúil a mheas ag deireadh gach bliana agus cuirfear na torthaí ar aghaidh chuig an gClárlann Acadúil, áit a gcuirfear isteach in SITS iad. Cinntear na torthaí deiridh ag cruinniú deiridh na Cúirte Scrúdaitheoirí ag deireadh Bhliain 2 le hionchur an scrúdaitheora sheachtraigh;
6. Is féidir le rannpháirtithe nach n-éiríonn leo pas a fháil i modúil mhúinte aonair scrúdú forlíontach a dhéanamh, nó measúnuithe an mhodúil a chur isteach arís. Ní féidir a leithéid a dhéanamh ach i dtrí chinn de mhodúil an chúrsa ar a mhéad (dhá mhodúl i mBliain 1 ar a mhéad, agus modúl múinte amháin i mBliain 2 ar a mhéad). Muna n-éiríonn le rannpháirtí sa phróiseas athmheasúnaithe, measfar gur theip ar an rannpháirtí agus féadfaidh siad cead a iarraidh ar Scoil an Oideachais chun an

modúl a athdhéanamh;

7. Féadfaidh rannpháirtithe a bhaineann 30 ECTS ar a laghad amach i mBliain 1 (trí phas a fháil i dtrí mhodúl múinte ar a laghad), agus a bhaineann níos lú ná 60 ECTS amach, imeacht ón gcúrsa le Teastas larchéime;
8. Féadfaidh rannpháirtithe a bhaineann 60 ECTS amach i mBliain 1 (trí phas a fháil i sé modúl múinte) imeacht ón gcúrsa le Dioplóma larchéime mura bhfuil siad ag dul ar aghaidh go Bliain 2, nó mura bhfuil Bliain 2 críochnaithe go rathúil acu;
9. Níl rannpháirtithe a fhágann an cúrsa le Dioplóma larchéime i dteideal Teastas larchéime a fháil;
10. Ní fhéadfaidh rannpháirtithe a fhágann an cúrsa le Teastas larchéime nó Dioplóma larchéime de dheasca teipe filleadh ar an gcúrsa Máistreacht ag dáta níos déanaí chun é a chur i gcrích;
11. Measfar gur theip ar rannpháirtí ar an gcúrsa Máistreacht nach mbaineann pasmharc amach i modúl an tráchtas (30 ECTS). Féadfaidh rannpháirtithe sa chás sin cead a iarraidh ar Scoil an Oideachais an tráchtas a athdhéanamh. Muna dtugtar cead nó más fearr leis an rannpháirtí, féadfaidh siad imeacht ón gcúrsa le Dioplóma larchéime;
12. Measfar gur theip ar rannpháirtí ar an gcúrsa Máistreacht má bhaineann siad amach pasmharc sa tráchtas, ach nach n-éiríonn leo pasmharc a bhaint amach sa mhodúl inniúlachta Gaeilge (Modúl 7). Is féidir leo cead a lorg ó Scoil an Oideachais Modúl 7 a athdhéanamh; Muna dtugtar cead nó más fearr leis an rannpháirtí, féadfaidh siad imeacht ón gcúrsa le Dioplóma larchéime;
13. Chun Máistreacht le Gradam a bhaint amach, ní mór nár theip ar rannpháirtithe le linn na tréimhse staidéir agus ní mór dóibh, ar a laghad, (i) marc 70% ar a laghad a bhaint amach sa tráchtas agus (ii) marc 70% ar a laghad a bhaint amach sa mhodúl Inniúlachta Gaeilge (Modúl 7), agus (iii) 68 % ar a laghad a bhaint amach mar mheánmharc foriomlán neamhchothromaithe do mhodúil Bhliain 1, agus 70% a bhaint amach i dtrí cinn de na modúil sin ar a laghad;
14. Chun Dioplóma larchéime le Gradam a bhaint amach, ní mór nár theip ar rannpháirtithe in aon mheasúnú i modúil múinte Bhliain 1 a bhí acu le linn na tréimhse staidéir agus ní mór dóibh, ar a laghad, (i) 68% ar a laghad a bhaint amach sa mheánmharc foriomlán atá ualaithe de réir ECTS agus (ii) marc íosta 70% a bhaint amach in, ar laghad, leath de mhodúil mhúinte Bhliain 1 atá riachtanach chun an Dioplóma larchéime a bhronnadh;
15. Chun Teastas larchéime le Gradam a bhaint amach, ní mór nár theip ar

rannpháirtithe in aon mheasúnú i modúil mhúinte Bhliain 1 a bhí acu le linn na tréimhse staidéir agus ní mór dóibh, ar a laghad, (i) 68% ar a laghad a bhaint amach sa mheánmharc foriomlán atá ualaithe de réir ECTS agus (ii) marc íosta 70% a bhaint amach in, ar laghad, leath de mhodúil mhúinte Bhliain 1 atá riachtanach chun an Teastas larchéime a bhronnadh;

16. Foilsítear torthaí uile an scrúdaithe iarchéime go hanaithnid faoi uimhir chláraithe rannpháirtithe;
17. Bronnfar an cháilíocht laistigh den ghrád, nuair is cuí, ar rannpháirtithe a n-éireoidh leo a gclár a chríochnú.
18. Athmheasúnú forlíontach/scrúduithe forlíontacha:
 - I. Níl aon chúiteamh ceadaithe thar mhodúil ná thar chomhpháirteanna measúnaithe laistigh de mhodúil. Ciallaíonn sé sin nár mhór do rannpháirtithe pas a bhaint amach i ngach modúil agus i ngach píosa measúnaithe chun pas a bhaint amach sa chlár nó i modúil ar leith;
 - II. Féadfaidh rannpháirtithe nach n-éiríonn leo 50% ar a laghad a bhaint amach i measúnú é a chur isteach arís. Sa chás sin, an dáta deiridh leis an measúnú a chur isteach ná mí amháin i ndiaidh dáta foilsithe na dtorthaí;
 - III. Ní cheadófar do mhic léinn measúnú a athdhéanamh ach uair amháin, agus is é 50% an t-uasmharc a bhronnfar ar an measúnú a chuirtear isteach arís;
 - IV. Ní féidir le mic léinn nach n-éiríonn leo pas a fháil sa phróiseas athmheasúnaithe dul ar aghaidh go Bliain 2 ná imeacht ón gcúrsa le Dioplóma larchéime. Mar sin féin, féadfaidh siad imeacht ón gcúrsa le Teastas larchéime ar an gcoinníoll go mbaineann siad pas amach i dtrí mhodúil (30 ECTS ar an iomlán). Is féidir leo, chomh maith, cead a lorg ó Scoil an Oideachais chun an cúrsa a athdhéanamh.

4.2 Modhanna Measúnaithe

Pléifidh comhordaitheoir an mhodúil na measúnuithe a bheidh le déanamh dá m(h)odúil. D'fhéadfadh na cineálacha measúnaithe seo a leanas a bheith san áireamh:

- Punann foghlama
- Podchraoltaí
- Féinmhachnamh criticiúil
- Micritheagasc

- Cur i láthair
- Obair ghrúpa
- Tuairiscí scríofa ar thaighde
- Scrúduithe cainte agus scríofa (Modúl 7)

4.3 Critéir Mheasúnaithe

Cuirtear na critéir seo a leanas san áireamh agus measúnú á dhéanamh ar shaothar:

- An leibhéal tuisceana atá ag rannpháirtí ar an litríocht nó ar an ábhar;
- An chaoi a gcuirtear an litríocht i láthair agus caighdeán na hanailíse a dhéantar ar an litríocht;
- An bhaint atá ag an saothar le teoiricí oideachais agus/nó leis an gcleachtas;
- Caighdeán na gconclúidí agus/nó na dtorthaí;
- Caighdeán na moltaí agus/nó na n-impleachtaí;
- Struchtúr agus cur i láthair: leagan amach ginearálta, ailíniú leis nósmaireachtaí acadúla, cúrsaí teanga.

Cuirtear rúibric ar fáil sa sainmhíniitheoir a bhaineann le gach modúl, ina mínítear na critéir ratha a bhaineann le measúnuithe an mhodúil.

4.4 Obair Chúrsa a Chur Isteach

Cuirtear obair chúrsa isteach trí Blackboard Ultra. Cuirfear tuairisc Turnitin ar fáil do gach píosa oibre scríofa. Ní mór measúnuithe scríofa a chlósáil.

Nuair is cuí, is féidir le rannpháirtithe samplaí ábhartha ó chleachtas gairmiúil nó taithí ghairmiúil a úsáid chun tacú lena n-argóint agus chun a gcumas a léiriú an teoiric a nascadh leis an gcleachtas. Níor cheart, áfach, aon sonraí inaitheanta nó pearsanta a thuairisciú (e.g. ainm scoile, eagraíochta, socrú oibre, ainm dalta, tuismitheora nó gairmí). Ba cheart tagairtí cruinne a dhéanamh d'obair fhoilsithe agus neamhfoilsithe daoine eile chun bradaíl a sheachaint.

Cuirtear aiseolas ar thascanna ar fáil i bhfoirm nótaí tráchta i scríbhinn. Tá sé mar aidhm ag an Scoil an grád sealadach a chur ar fáil laistigh de thréimhse sé seachtaine (tríocha lá oibre) ón uair a gcuirtear tasc isteach, ach amháin má thugtar dáta eile le haghaidh aiseolais do rannpháirtithe nuair a chuirtear tascanna isteach. Is grád sealadach é aon ghrád a chuireann

léachtóir nó teagascóir ar fáil go dtí go ndéantar é a fhaomhadh ag an gCúirt Scrúdaitheoirí.

4.5 An Scríbhneoireacht Acadúil

Cuirtear leabhrán ar fáil maidir leis an scríbhneoireacht acadúil.

4.6 Ionracas Acadúil, Bradaíl agus Polasaí Maidir le hÚsáid na Teicneolaíochta

Ba chóir do rannpháirtithe a bheith ar an eolas faoi pholasaí agus faoi ráiteas an Choláiste maidir leis an ionracas acadúil agus faoin bpróiseas a leantar nuair a sháraítear an t-ionracas acadúil:

An Polasaí: <https://www.tcd.ie/media/tcd/about/policies/pdfs/academic/Academic-Integrity-Policy.pdf>

An Ráiteas: <https://www.tcd.ie/academic-affairs/academic-integrity/statement-on-academic-integrity/#:~:text=College%20Statement%20on%20Academic%20Integrity&text=In%20Trinity%20College%20Dublin%2C%20we,members%20of%20the%20College%20community>

An Próiseas: <https://www.tcd.ie/media/tcd/about/policies/pdfs/academic/Suspected-Academic-Misconduct-Procedure.pdf>

Ní mór do rannpháirtithe M.Oid. a thaispeáint go bhfuil siad tar éis na torthaí foghlama a bhaineann le gach modúl – agus leis an gcúrsa ina iomláine – a bhaint amach sna measúnuithe a chuireann siad isteach.

Mar rannpháirtí M.Oid. agus mar údar, tá tú freagrach as substaint an mheasúnaithe. Caithfear a chinntiú:

- Gur leatsa bunsmaointe agus coincheapadh an phíosa oibre;
- Gur tusa a scríobh nó a chuir le chéile ábhar an mheasúnaithe;
- Gur tusa atá freagrach as cruinneas an eolais a chuirtear i láthair san aiste agus as iontaoibh na hoibre;
- Go bhfuil máistreacht agat ar na scileanna teanga atá riachtanach don chlár seo.

An ról atá ag uirlisí teicneolaíochta, uirlisí ISG san áireamh.

De réir Ráiteas an Choláiste ar Intleacht Shaorga agus IS Giniúnach i dTeagasc, Foghlaim, Measúnú & Taighde (2024), ceadáítear IS Giniúnach a úsáid mura gcuirtear a mhalairt in iúl. I gcásanna ina n-úsáidtear aschur ó IS Giniúnach chun tacú le doiciméad nó le toradh oibre mic léinn, ba chóir an úsáid sin a admháil agus a lua go cuí, de réir [threoirlínte na Leabharlainne maidir le haitheantas a thabhairt agus tagairt do IS Giniúnach](#). Ó thaobh

ionracais acadúil de, má ghineann mac léinn ábhar ó uirlis IS Giniúnach agus má chuireann sé/sí/siad i láthair é mar a gcuid saothair féin, meastar gur bradaíl é sin, a shainmhínítear mar mhí-iompar acadúil de réir Pholasáí Ionracas Acadúil an Choláiste.

D'fhéadfadh ról tacaíochta a bheith ag teicneolaíochtaí, uirlisí Intleachta Saorga Giniúnaí (ISG) san áireamh e.g. ChatGPT nó a leithéid, agus obair chúrsa á cur i gcrích ag rannpháirtithe M.Oid. Caitear le huirlis ISG ar an mbealach céanna is a chaitear le piara le linn seisiún piarmheasúnaithe: is féidir do smaointe agus do shaothar a phlé leis an uirlis ISG, ach ní mór a chinntiú gur leatsa an obair ar fad a chuireann tú isteach. Tá an polasaí seo ailínithe le polasaí de chuid an Dr David Joyner ag ollscoil Georgia Tech (Smith, 2023).

Mar sin, níl cead uirlisí ISG a úsáid nuair nach dtugtar cead sonrach é a úsáid ná ar bhealach a fhágann nach leatsa an obair shubstainteach a bhaineann le coincheapadh agus scríobh na haiste (nó cur le chéile podchraoltaí, físeán, cur i láthair etc), agus mar sin, nach féidir le meastóirí meastóireacht a dhéanamh ar bhaint amach na dtorthaí foghlama.

Ar an mbonn sin, níl cead comhráite a bhíonn agat le huirlis ISG – ná aon chuid díobh – a chóipéail isteach i d'aiste/do mheasúnú. Breathnaítear ar chomhrá le huirlis ISG mar eispéireas foghlama (féideartha), seachas mar uirlis scríbhneoireachta.

Freagraíochtaí ginearálta

Áit a mbíonn comhrá agat le huirlis ISG, ní mór:

- Go leor tuisceana a bheith agat chun meastóireacht a dhéanamh ar chruinneas an eolais a ghineann uirlisí ISG. Moltar go láidir úsáid a bhaint as uirlis ISG a luann an fhoinsé eolais a úsáideann sí in ionad uirlise nach luann an fhoinsé, le gur féidir an bhunfhoinsé a léamh agus a thuiscint.
- Anailís chriticiúil a dhéanamh ar aschur ó uirlisí ISG, os rud é go mbíonn claontaí sna freagraí a thugann uirlisí ISG go minic.

Cuirtear samplaí ar fáil sa tábla thíos de na freagrachtaí atá ort mar údar aiste agus den chineál úsáide gur féidir a bhaint as uirlisí teicneolaíochta, uirlisí ISG san áireamh.

Cur síos ar an ról	Mar údar, tá tú freagrach as <u>substaint na haiste</u>	D'fhéadfadh <u>ról tacaíochta</u> a bheith ag uirlisí ISG
	Freagrachtaí samplacha : Rannpháirtí M.Oid.	Féidearthachtaí: Uirlisí ISG
Coincheapú	Anailís ar chomhthéacs teanga agus oideachais na ndaltaí agus	

	ar do chleachtas féin. Bearna a aithint más cuí.	
	Anailís a dhéanamh ar an litríocht a bhaineann leis an réimse taighde, agus meastóireacht a dhéanamh ar chaighdeán na fianaise a chuirtear ar fáil sa litríocht.	Seiceáil nach bhfuil aon fhoinsí litríochta fágtha ar lár. <u>Nóta:</u> tá sé an-tábhachtach go bhfuil tuiscint chriticiúil agat ar mhodheolaíochtaí agus torthaí aon taighde a luann tú. Mar sin, má aimsítear foinsí nua le huirlis ISG, ní mór iad a léamh agus anailís a dhéanamh orthu tú féin.
	Tuiscint ar an gcineál gníomhaíochta, measúnaithe nó straitéisí teagaisc atá ag teastáil, bunaithe ar thuiscint ar an gcomhthéacs oideachais agus anailís ar an litríocht.	Samplaí a lorg maidir le gníomhaíocht/straitéisí/acmhainní a d'fhéadfaí a úsáid le do sprioc oideolaíochta a bhaint amach.
Dréachtú agus eagarthóireachta	Leagan amach na haiste/an mheasúnaithe a dhearadh.	Aiseolas a lorg ar leagan amach an aiste.
	An aiste a scríobh/an measúnú a chur le chéile.	Aiseolas a lorg ar an aiste.
	Eagarthóireacht a dhéanamh ar an aiste/saothar.	
Sláine acadúil a dheimhniú	A chinntiú go bhfuil an t-eolas a chuirtear ar fáil san aiste cruinn.	Aiseolas a lorg ar an eolas atá san aiste.
	A chinntiú go bhfuil tagairt déanta agat d'fhoinsí acadúla ar baineadh úsáid astu.	
	A chinntiú go bhfuil na tagairtí ar fad cruinn.	Aiseolas a lorg ar an tslí ar cuireadh an stíl tagartha i bhfeidhm sa saothar.
Teanga	A thaispeáint go bhfuil máistreacht agat ar na scileanna teanga ar fad.	Eolas nó aiseolas a lorg maidir le ceisteanna teanga.

	Leibhéal sásúil cruinnis a thaispéaint	
--	--	--

Má bhaineann tú úsáid as uirlis ISG, ní mór ráiteas a scríobh ag tús an mheasúnaithe ina gcuirtear an méid seo a leanas in iúl:

- Cén uirlis a d'úsáid tú;
- Cad chuige ar úsáid tú í? (na feidhmeanna a lua);
- Cad í an leid a chuir tú isteach (más cuí)?
- Cad a rinne tú leis an eolas a thug an uirlis duit?

Má tá amhras ar an meastóir faoi úsáid na teicneolaíochta, d'fhéadfadh go n-iarrfaí ar an rannpháirtí

- Viva voce a dhéanamh, i gcás go mbítear den tuairim gur baineadh úsáid as teicneolaíocht ar bhealach a fhágann nach leis an rannpháirtí substaint na hoibre ina hiomláine, agus mar sin go bhfuil seans ann nach bhfuil na torthaí measúnaithe bainte amach ag an rannpháirtí.
- Sampla scríbhneoireachta a scríobh, sa chás go bhfuil amhras ann faoi úsáid teicneolaíochtaí meaisínáistriúcháin nó úsáid ISG chun crích teanga.

Uirlisí aistriúcháin

Os rud é go bhfuil forbairt ar an gcumas teanga i gcroílár an chúrsa seo, níl cead uirlisí aistriúcháin a úsáid le téacs a ghiniúint do mheasúnú.

Tagairt

Smith, E. (2023, Meitheamh 15). *New Policies Navigate Role of AI Assistants in CS Courses*. Georgia Tech College of Computing. <https://www.cc.gatech.edu/news/new-policies-navigate-role-ai-assistants-cs-courses>

4.7 Athsheiceáil agus Achomhairc

Tá sé de cheart ag gach rannpháirtí a dtorthaí acadúla a phlé leis an mball/na baill foirne chuí. Ní féidir gráid deiridh a phlé le rannpháirtithe go dtí go bhfoilseofar na torthaí a dheimhnítear ag an gCúirt Scrúdaitheoirí. Tá na rialacháin maidir le hathsheiceáil ar thorthaí leagtha amach i bhFéilire an Choláiste (Cuid III).

Ba chóir do rannpháirtithe ar mian leo achomharc a dhéanamh ar thorthaí é sin a dhéanamh, ar an gcéad dul síos, i scríbhinn chuig Comhordaitheoir an M.Oid. Ba cheart na forais le

hachomharc acadúil a shonrú go soiléir agus ba cheart fianaise dhoiciméadach a bheith mar thaca leo nuair is gá. Pléifidh an Comhordaitheoir an cás leis na páirtithe ábhartha agus déanfar iarracht réiteach a fháil. Mura mbíonn réiteach sásúil ann, is féidir le rannpháirtí an cás a chur faoi bhráid Choiste Achomhairc larchéime na Scoile. Tá sé de cheart ag rannpháirtithe cinntí Choiste Achomhairc larchéime na Scoile a achomharc chuig Déan an Léinn larchéime, agus ina dhiaidh sin chuig an gCoiste Achomhairc Acadúil do Mhic Léinn larchéime (Múinte). Ní phléifidh an Coiste seo le hachomharc den sórt sin ach amháin sna cásanna seo a leanas:

1. Níl an cás clúdaithe faoi ghnáth-rialacháin an Choláiste;
2. Creideann an mac léinn nár cuireadh rialacháin an Choláiste i bhfeidhm go cuí;
3. Is achomharc *ad misericordiam* é.

Ní féidir leis an mac léinn achomharc a dhéanamh atá i gcoinne ghnáthchur i bhfeidhm rialacháin acadúla an Choláiste, seachas ar fhorais *ad misericordiam*. Ní mór a nótáil nach féidir le coiste achomhairc ar bith cinneadh acadúil na scrúdaitheoirí ar an obair a chur ar neamhní: ní fhéadfar ach athruithe a bhaineann le nósanna imeachta a mholadh (Féilire an Choláiste, Cuid III).

4.8 Sceideal Measúnaithe na Bliana

Cuirfear sceideal ar fáil ag tús na bliana acadúla.

4.9 Acmhainní Úsáideacha

Moltar do rannpháirtithe úsáid a bhaint as Microsoft Word ina bhfuil litreoir Gaeilge ar fáil. Bíonn rochtain ar aipeanna de chuid Microsoft ag rannpháirtithe (tuilleadh eolais ar fáil anseo: <https://www.tcd.ie/itservices/our-services/microsoft-365-apps-for-students/>).

Tá eolas maidir leis an mbealach chun socrúithe teanga a athrú ar fáil anseo: <https://support.microsoft.com/en-us/office/add-an-editing-or-authoring-language-or-set-language-preferences-in-office-663d9d94-ca99-4a0d-973e-7c4a6b8a827d>

Foclóirí

Foclóir.ie: Is foclóir Béarla-Gaeilge é seo. Tá bunachar mór frásaí agus abairtí ann, agus tá comhaid fuaime sna mórchanúintí nasctha le cuid mhaith de na hiontrálacha.

Teanglann.ie: Tá foclóir Gaeilge-Béarla (Ó Dónaill, 1977) agus foclóir Béarla-Gaeilge (de Bhaldraithe, 1959) ar fáil ar an suíomh seo, chomh maith le foclóir aonteangach Gaeilge (Ó

Dónaill & Ua Maoileoin, 1991). Is é Foras na Gaeilge a chuireann foclóir.ie agus teaglann.ie ar fáil.

Téarma.ie: Is foclóir téarmaíochta é seo. Is é seo an áit is fearr le saintéarmaíocht, téarmaíocht theicniúil agus téarmaí nua a aimsiú. Is féidir ceist téarmaíochta a árdú chomh maith (<https://www.tearma.ie/ceist/>), muna bhfuil téarma ar fáil mar shampla, agus pléifidh an Coiste Téarmaíochta é. Tá an suíomh seo á bhainistiú ag grúpa taighde Gaois, Fiontar & Scoil na Gaeilge (DCU) i gcomhar leis an gCoiste Téarmaíochta, Foras na Gaeilge.

Gramadach

An Caighdeán Oifigiúil: tá an leagan is déanaí den Chaighdeán Oifigiúil ar fáil anseo. **Nóta:** *glacfar le leaganacha malartacha nó leaganacha canúnacha sna measúnuithe chomh maith.*

Teaglann.ie: Cuirtear eolas gramadaí ar fáil (e.g. ainmfhocail agus aidiachtaí sa tuiséal ginideach, briathra sna haimsirí éagsúla) sa táb ar bharr an leathanaigh dar teideal *Gramadach*. Chomh maith leis sin, cuireann uirlis darb ainm an *Draoi Gramadaí* aonaid (ainmfhocal + aidiacht) sa tuiséal ainmneach agus sa tuiséal ginideach ar fáil (sampla thíos).

AN DRAOI GRAMADAÍ

AINMFHOCAL + AIDIACHT ▼

1 ROGHNAIGH AINMFHOCAL

oideachas
AINMFHOCAL
FIRINSNEACH
1ú DÍOCHLAONADH

+

2 ROGHNAIGH AIDIACHT

dátheangach
AIDIACHT
1ú DÍOCHLAONADH

Uatha

AINMNEACH

oideachas dátheangach

• an t-oideachas dátheangach

GINIDEACH

oideachais dhátheangaigh

• an oideachais dhátheangaigh

NÓTA Nuair nach mbíonn an t-alt (**an**) i láthair, is iondúil gurb é an t-ainmneach a úsáidtear in áit an ghinidigh: **ag lorg an oideachais dhátheangaigh, le haghaidh an oideachais dhátheangaigh** ach **ag lorg oideachas dátheangach, le haghaidh oideachas dátheangach.**

An Gramadóir: Is seiceálaí gramadaí é seo a d'fhorbair an tOllamh Kevin Scannell. Tá sé ar fáil ar líne agus is féidir é a íoslódáil ar an ríomhaire chomh maith. Tá sampla thíos.

Téacs le seiceáil:

Tá mé i mo cónaí le Liam. Is duine dheas é Liam. Bhuaill mé leis nuair a bhí mé ag dul go Bhaile Átha Cliath ar an bus.

Seol Glan

Teanga an chomhéadain:

☐ Afracáinis (af)	☐ Mongóilis (mn)
☐ Béarla (en_US)	☐ Ollainnis (nl)
☐ Breatnais (cy)	☐ Rómáinis (ro)
☐ Danmhairgis (da)	☐ Sínis (zh_CN)
☐ Esperanto (eo)	☐ Slóvaicis (sk)
☐ Fionlainnis (fi)	☐ Spáinnis (es)
☐ Francis (fr)	☐ Sualainnis (sv)
☒ Gaeilge (ga)	☐ Ungáiris (hu)
☐ Gearmáinis (de)	☐ Vítneamais (vi)
☐ Indinéis (id)	

1: Tá mé i **mo cónaí** le Liam.
Séimhiú ar iarraidh

1: Is duine **dheas** é Liam.
Séimhiú gan ghá

1: Bhuaill mé leis nuair a bhí mé ag dul **go Bhaile Átha Cliath** ar an bus.
Séimhiú gan ghá

1: Bhuaill mé leis nuair a bhí mé ag dul go Bhaile Átha Cliath **ar an bus**.
Urú nó séimhiú ar iarraidh

Aistear.ie: Tá bunachar iontrálacha ar an suíomh seo ina bpléitear ceisteanna gramadaí (e.g. má agus dá a úsáid mar is ceart), ceisteanna brí (e.g. scéal nó scéala a úsáid) agus ceisteanna stíle. Is é Antain Mac Lochlainn eagarthóir an tsuímh seo.

Tagairtí

Stíl APA 7: Baintear úsáid as stíl APA 7 in obair chúrsa an M.Oid. Tá treoirlínte na stíle ar fáil do sa leabhrán *Treoir: An Scríbhneoireacht Acadúil* (leabhrán a chuirtear ar fáil do rannpháirtithe M.Oid.) agus ag an nasc a leanas: <https://apastyle.apa.org/style-grammar-guidelines>.

EndNote: Cuirtear bogearra EndNote ar fáil saor in aisce do mhic léinn Choláiste na Tríonóide. Ligeann EndNote don úsáideoir tagairtí a choinneáil in aon áit amháin agus leabharliosta a chruthú go héasca. Is féidir Endnote a íoslódáil anseo: <https://www.tcd.ie/library/support/endnote/download.php>. Tá treoir maidir lena úsáid ar fáil anseo: <https://www.tcd.ie/library/support/endnote/>

Google Scholar: Cuirtear tagairtí ar fáil ar shuíomh Google Scholar chomh maith (sampla thíos). Caithfear a sheiceáil, áfach, go bhfuil an tagairt cruinn agus go bhfuil an t-eolas ar fad atá ag teastáil sa tagairt.



[PDF] Bilingual/**immersion education**: What the research tells us

[PDF] academia.edu

[S May](#) - Encyclopedia of language and **education**, 2008 - academia.edu

... findings about bilingual/**immersion education** and the related ... of what constitutes an effective **educational** approach for bilingual ... bilingual/**immersion education** remain commonplace. ...

☆ Save [Cite](#) Cited by 204 Related articles All 2 versions [↗](#)

Immersion education in the early years: A special issue

[PDF] tandfonline.com

[TM Hickey](#), [AM de Mejía](#) - ... Journal of Bilingual **Education** and ..., 2014 - Taylor & Francis

... Early years' **immersion education** programmes can be either ... policy concerns relating to **immersion education** in the early years. ... The importance of training in **immersion** methodology for ...

☆ Save [Cite](#) Cited by 66 Related articles All 4 versions

Two-way **immersion education**: Students learning through two languages

[PDF] jstor.org

[D Christian](#) - The Modern Language Journal, 1996 - Wiley Online Library

... In this article, the current state of two-way **immersion education** in the US will be described. The findings come from a study in which researchers collected information about two-way ...

☆ Save [Cite](#) Cited by 379 Related articles All 3 versions

5. Seirbhísí agus Saol an Choláiste

5.1 An Leabharlann

Cuireann an leabharlann réimse seirbhísí ar fáil do rannpháirtithe M.Oid. Bíonn cearta iomlána iasachtaíochta ag rannpháirtithe agus bíonn rochtain acu ar acmhainní ar líne na hOllscoile. Bíonn turas ar leabharlanna Lecky agus Berkley ar fáil do gach úsáideoir nua. Tá sonraí iomlána maidir le huaireanta oscailte agus suíomh na mbailiúchán sa leabharlann ar fáil anseo: <https://www.tcd.ie/library/using-library/>. Tá leabharlannaí ar speisialtóir í san Oideachas, Geraldine Fitzgerald (fitzgey@tcd.ie), ar féidir léi cabhrú le rannpháirtithe M.Oid.

Mar mhac léinn de chuid Choláiste na Tríonóide, is féidir leat cárta Library Link a fháil. Fágann cárta Library Link gur féidir staidéar a dhéanamh i leabharlanna in Ollscoileanna eile e.g. in Ollscoil na Gaillimhe, Ollscoil Luimnigh, Ollscoil Uladh. Tá tuilleadh eolais faoi scéim seo ar fáil anseo: <https://www.tcd.ie/library/using-library/admissions/alcid-students.php>

5.2 Seirbhísí Míchumais na Tríonóide

Moltar do mhic léinn iarchéime atá faoi mhíchumas clárú leis na Seirbhísí Míchumais chun plean tacaíochta a phlé. I measc na dtacaíochtaí do mhic léinn iarchéime tá:

- Tacaíocht Acadúil
- Teicneolaíocht Chúnta
- Teiripe Shaothair
- Tacaíocht maidir le Socrúcháin agus Intéirneachtaí
- Ullmhúchán do scrúduithe Viva Voce

Is féidir iarratas a dhéanamh tríd an táb dar teideal 'My Disability Service' ar my.tcd.ie.

5.3 An tSeirbhís Chomhairleach Iarchéime (*Postgraduate Advisory Service*)

Cuireann an tSeirbhís Chomhairleach Iarchéime (SCP) réimse cuimsitheach tacaíochtaí acadúla, tréadacha agus gairmiúla ar fáil. Tá an SCP faoi stiúir an Oifigigh Tacaíochta Iarchéime a chuireann tacaíocht ar fáil do gach mac léinn iarchéime i gColáiste na Tríonóide. Is é an tOifigeach Tacaíochta Iarchéime an chéad phointe teagmhála mar fhoinse tacaíochta agus treorach.

Chomh maith leis sin, tá triúr ball foirne acadúla ag gach Dámh a cheaptar mar Chomhairleoirí larchéime agus is féidir leis an Oifigeach Tacaíochta larchéime tú a chur i dteagmháil leo chun cúnamh breise a fháil más gá. Tá sonraí teagmhála an Oifigh Tacaíochta larchéime agus an Phainéil Chomhairligh ar fáil ag <https://www.tcd.ie/seniortutor/students/postgraduate/>

Tá an SCP ann lena chinntiú go bhfuil pointe teagmhála ag gach mac léinn iarchéime, áit ar féidir leo dul i muinín tacaíochta agus eolais ar sheirbhísí an Choláiste agus ar shaincheistanna acadúla a d'fhéadfadh teacht chun cinn dóibh. Cuirtear comhairle ar fáil maidir le hachomhairc acadúla a eascraíonn as scrúduithe nó tráchtas, deacrachtaí le stiúrtóireacht taighde, eolas ginearálta ar shaol na mac léinn iarchéime, agus go leor ábhar eile. Má tá amhras ort, téigh i dteagmháil leis an SCP. Caithfear go rúnda le gach ceist. Chun tuilleadh eolais a fháil ar an méid a chuireann PAS ar fáil, féach ar a suíomh gréasáin.

5.4 Seirbhísí Tacaíochta

Cuireann Coláiste na Tríonóide seirbhísí ar fáil chun tacú le mic léinn. Is é suíomh gréasáin TCD an áit is fearr chun tuilleadh eolais a fháil orthu.

- **Seirbhísí comhairleachta do mhic léinn (Student Counselling Service):** is seirbhís í seo a chuirtear ar fáil saor in aisce do rannpháirtithe.
- **Niteline:** Is seirbhís éisteachta é seo atá ar an bhfód le 25 bliain, agus atá ar fáil do rannpháirtithe ó 9pm-2.30am.
-

5.5 Seirbhísí Tacaíochta Foghlama


Seirbhísí Forbartha Foghlama do Mhic Léinn (Student Learning Development Services)

Tá Seirbhísí Forbartha Foghlama do Mhic Léinn mar chuid den tSeirbhís Chomhairleoireachta i gColáiste na Tríonóide, Baile Átha Cliath. Is é an ról atá acu cabhrú le mic léinn feabhas a chur ar a scileanna foghlama agus staidéir trí thacaíocht agus ceardlanna duine le duine a chur ar fáil. Is féidir leo comhairle a chur ar fáil maidir le: straitéisí scríbhneoireachta acadúla, scileanna staidéir agus scrúdaithe, bainistíocht ama, cuir i láthair, machnamh criticiúil agus tráchtas a scríobh. Tuilleadh eolais ar fáil anseo: <https://www.tcd.ie/sld/services/>

Cuireann **An tIonad um Chleachtas Acadúil (Centre for Academic Practice)** comhairle úsáideach ar fáil do mhic léinn iarchéime, agus tá sonraí faoina gcuid gníomhaíochtaí ar fáil ag: <https://www.tcd.ie/academicpractice/>

5.6 Seomra na Gaeilge

Is spás caidrimh agus comhrá do lucht na Gaeilge sa Choláiste é Seomra na Gaeilge. Bíonn nuachtáin agus foilseacháin i nGaeilge ar fáil sa seomra, mar aon le háiseanna tae agus caife. Bíonn an Seomra ar oscailt i rith an téarma acadúil, Luan go hAoine, idir 9.00rn agus 4.30in, agus beidh imeachtaí eile á reáchtáil ann freisin. Tá an Seomra lonnaithe i bhfoirgneamh an Phroinntí (Dining Hall), os cionn bhialann an Bhutraigh. Féach na treoracha sna pictiúir thíos.



5.7 An Cumann Gaelach

Bunaíodh Cumann Gaelach Choláiste na Tríonóide i 1906 agus tá sé ag fás ó shin. Tá sé mar chuspóir ag an gCumann deis agus ionad teagmhála a sholáthar dóibh siúd a bhfuil spéis acu an Ghaeilge a labhairt, a fheabhsú nó a fhoghlaim. Gach bliain eagraíonn an Cumann céilithe, grúpaí amhránaíochta, ranganna rince seite, bunranganna Gaeilge d'eachtrannaigh, agus deirí seachtaine as baile, agus reachtáiltear seachtain d'ócáidí cultúrtha gach bliain, Éigse na Tríonóide, agus tá sé seo i measc mhórócáidí na bliana. Tá an Cumann lonnaithe i Seomra 8 san Atrium.

Tuilleadh eolais ar shuíomh an Chumainn Gaelaigh:

<https://www.instagram.com/cumanngaelachtcd/>



5.8 Searmanais Bhronnta

Bíonn an searmanas bronnta céime ar siúl i Halla na Scrúduithe sa Choláiste. Ceadáítear beirt aíonna, agus bíonn fáiltiú neamhfhoirmiúil na hOllscoile ar siúl tar éis an tsearmanais. Is féidir le rannpháirtithe dáta a searmanais a roghnú (cuireann an Ollscoil na dátaí ar fáil), cé go bhfuil an Ollscoil ag súil leis an gcéim a bhronnadh laistigh de dhá bhliain i ndiaidh do rannpháirtithe an tráchtas a leagan isteach. Roghnaíonn formhór na rannpháirtithe searmanas an Earraigh, a bhíonn ar siúl i mí Aibreáin de ghnáth. Is féidir an chéim a bhronnadh “in absentia”.

5.9 Seomra Léitheoireachta Iarchéime 1937

Bíonn an Seomra Léitheoireachta Iarchéime 1937, atá lonnaithe ar an gCearnóg Tosaigh in aice leis an Halla Scrúdúcháin, oscailte ó Luan go hAoine: 24 uair an chloig, Dé Sathairn agus Dé Domhnaigh: 24 uair an chloig ar fad ar feadh na bliana, agus cuireann sé áit chiúin ar fáil chun staidéar a dhéanamh inar féidir le mic léinn iarchéime leas a bhaint as rochtain ar ríomhaire agus ar an idirlíon, fótachóipeáil, agus priontáil ar chostas íseal.